

macht sehen/dann sie sich im Meer darnach richten müssen/vnnd dar-
 auß sehen/mit was Wind sie sich behelffen / vnd wohin sie ihren strich
 nemen sollen/vnnd wo sie die Statt oder ort/ dahin sie begeren/finden
 mögen/als auch wie weit von einem ort zum andern ist/erfahren. Vnd
 auff das man desto leichter alle örter/deren inn diser Beschreibung ge-
 dacht/in diser benligenden LandtTaffel finden/vnd ire gelegenheit wis-
 sen möge/hab ich zu end ein Register/darinnen alle örter nach dem A
 B C verfasst/mit iren gradibus longitudinis vnd latitudinis, hier-
 zu gethan: welche in der LandtTaffel auff dise weiß zu finden sein / als
 zum Exempel: Ich setze/du woltest gern wissen / wo die vorgemeldte
 Statt Morequito inn diser LandTaffel gelegen ist/So suche hinten
 im Register in dem Buchstaben M. das wird dir sagen/das sie vnter
 den 16½. G. Long. ligt. Solche zahl such auff dem Equatore, zu mit-
 ten in der LandtTaffel/vnd ziehe ein Linial oder Faden drauff. Zum
 andern zeigt dir das Register auch an / das solche Statt vnter den 4-
 G. Lat. oder Eleuationis poli lige / derwegen ziehe auch einen Faden
 auff dise zahl/so zur rechten vnd lincken Hand diser Charten stehet / so
 wirst du die Statt im Creuz/da die beyden Faden zu sammen kommen
 finden. Also thue mit allen andern Stätten / so du suchen wilt.

Caput I I.

Von der gelegenheit vnd eigenschafft dises Königreichs.

Dise Prouinz oder Königreich Guiana, ligt in
 America/oder inn der neuen Welt / gerad vnter der
 linea Aequinoctiali, zwischen Brasilia vnd Peru, hat
 viel treffliche wol erbaute Stätt / schöne gewaltige
 grosse Flüß/ist vberauß Goldreich/vnd sein alda al-
 lerley Thier in grossem vberfluß/es sollen auch Leut
 von wunderbarer selzamer gestalt / wie wir hernach
 cher